

Память священномучеников Андрея, Николая и Николая, преподобномучениц Антонины и Надежды.

Служба святым новомученикам Егорьевским:

День памяти 23 февраля/7 марта

На велицей вечерни поем, Блажен муж: 1-й антифон.

На Господи воззвах стихиры на 8, глас 5:

Новомученицы преславнии, кровьюми вашими землю освятите,
жизни вечная наследие приясте, Христовы правды
не отвергостесь и ныне неизреченную доброту зрите Владыки
своего. Емуже в житии последовавше к Нему желали есте
преставитися, Того со дерзновением молите спастися душам
нашим.

Пяточисленное сочетание покровителей наших почтим
славнаго Андрея и крепкую Николаев двоицу, в житии во Христа
облекшихся, сих бо пастырей смерть к Пастыреначальнику
восхождение бысть. С нимиже Антонину и Надежду,
добродетелей образ и монашествующих утверждение, купно
бо вси молят Владыку о душах наших.

Чудную куплю совершили есте новомученицы всеблаженнии,

яко кровию куписте вечную жизнь. Темже и злоумных мучителей посрамися полк; тии бо восхотеша уловити вас, вы же плоть в руках оставльше ловителей, к Богу возлетели есте, яко орли, и молитесь Спаса о душах наших.

Слава, глас 6: На Господа, добропобеднии мученицы все возложше упование, и Богоданною любовью осиявшиися богато, души своя за ближних усердно положили есте, темже на небесех обретосте мзду трудов ваших. Дерзновение имуще ко Христу Богу, мир испросите душам нашим.

И ныне, Богородичен, глас тойже: Кто тебе не ублажит, Пресвятая Дево; кто ли не воспоеет Твоего пречистаго рождества; безлетно бо от Отца возсиявый Сын Единородный, Тойже от Тебе Чистыя пройде неизреченно воплощься, естеством Бог Сый, и естеством быв человек нас ради, не во двою лицу разделяемый, но во двою естеству, неслитно познаваемый: Того моли Чистая Всеблаженная, помиловатися душам нашим.

Вход. Свете тихий: Прокимен дне, и чтения три.

Пророчества Исаина чтение.

Тако глаголет Господь: вси языцы собращася вкупе, и соберутся князи от них. Кто возвестит сия в них; или яже от начала, кто слышана сотворит вам; да приведут свидетели своя, и оправдятся, и да услышат, и да рекут истину. Будите ми свидетели, и аз свидетель, глаголет Господь Бог, и Отрок Егоже избрах, да познаете и веруете Ми, и разумеете, яко аз есмь: прежде Мене не бысть ин Бог, и по Мне не будет. аз есмь Бог, и несть разве мене спасающий. аз возвестих и спасох, уничижих, и не бе в вас чуждий. Вы Мне свидетели, и аз Господь

Бог, и еще от начала Аз есмь: и несть от рук Моих избавляяй,
сотворю, и кто отвратит то; сице глаголет Господь
Бог, избавляяй вас Святыи Израилев.

Премудрости Соломоновы чтение.

Праведных души в руце Божией и не прикоснется их мука.
Непщевани быша во очесех безумных умрети, и вменися
озлобление исход их. И еже от нас шествие сокрушение, они же
суть в мире. Ибо пред лицом человеческим аще и муку примут,
упование их бессмертия исполнено. И в мале наказани бывше,
великими благодетельствовани будут, яко Бог искуси я, и обрете
их достойны Себе. Яко злато в горниле искуси
их, и яко всеплодие жертвенное прият я. И во время посещения
их возсияют: и яко искры по стеблию потекут: Судят языком,
и обладают людьми, и воцарится Господь в них во веки.
Надеющиися нань разумеют истину, и вернии в любви пребудут
Ему: яко благодать и милость в преподобных Его, и посещение
во избранных Его.

Премудрости Соломоновы чтение.

Праведницы во веки живут и в Господе мзда их, и попечение
их у Вышняго. Сего ради примут царствие благолепия, и венец
доброты от руки Господни, зане десницею покрывает я, и мышцею
защитит их. Приимет всеоружие рвение свое, и вооружит тварь
в месть врагом. Облечется в броня правды, и возложит шлем,
суд нелицемерен. Приимет щит непобедимый преподобие:
Поострит же напрасный гнев во оружие: споборет же
с ним мир на безумныя. Пойдут праволучныя стрелы молниины,
и яко благокругла лука облаков, на намерение полетят.
И от каменометныя ярости исполнь падут грады, вознегодует

на них вода морская, реки же потопят я нагло. Сопротив станет им дух силы и яко вихор развеет их, и опустошит всю землю беззаконие: и злодейство превратит престолы сильных. Слышите убо царие, и разумеите, навыкните судии концев земли. Внушите держащии множества, и гордящиися о народах языков, яко дана есть от Господа держава вам и сила от Вышняго.

На литии стихиры: глас 5:

Божественнии страдальцы, души ваша от страстей свободили есте, телеса же на страсть за Христа вдали есте, сего ради уготовисте себе Духа Святаго жилище, и пришед Христос со Отцем обитель в вас сотвори. Ныне на небесех трисолнечнаго сияния зарями просвещаемы, светозарнаго нам покаяния благодать подайте и бед всеразличных избавитися нам Христа умолите.

Преславне отче Андрее, ты Христом данный ти залог верно соблюл еси, стадо словесное добре упасл еси, темже мученичества подвиг прием, милость Божию приклони на паству свою.

Пасти овец Христовых поставленный, святе Николае, сам, яко агнец во всесожжение принеслся еси, первопастырю Христу служа и агнцу Божию радостно подражая.

Кровию Христовою люд Божий питавай, мучений чашу кротко испил еси, хлеб жизни верным предлагавый, из руки отступников смерть вкусил еси, священномучениче Николае, Христов свидетелю истинный.

Слава, глас 3: Ни лютость безбожных мучителей, ни скорби изгнания, ни слабость женская победиша вас, святии блаженнии страдальцы Антонино и Надеждо, темже злодейств запинаящаго нас древняго исконнаго врага избегнути молитвами вашими да сподобимся.

И ныне, Богородичен: Богородице, предстательнице всех молящихся Тебе, Тобою дерзаем, и Тобою хвалимся, и к Тебе все упование наше есть: моли рождшагося из Тебе за непотребныя рабы Твоя.

На стиховне стихиры, глас 4:

В песнопениях восхвалим вернии страстотерпцев Егорьевских новомучеников, и к ним сладкопесенно возопим глаголюще: Радуйтесь Андрее Николае и Николае. Радуйтесь Антонино и Надеждо, яко имущии дерзновение ко Христу Богу нашему, мученицы всечестнии: того прилежно молитесь, спаситися верою совершающим всечестную память вашу.

Стих: Воззваша праведнии, и Господь услыша их.

Мужественнейшим помыслом прешедше мучения, чуднии страстотерпцы иереи Божии, сквозе страдания преидосте и преминусте ко спасения широты, наследие приемше небесное Царство: в немже творите о нас Божественныя мольбы, мудрии страдальцы.

Стих: Честна пред Господем смерть преподобных Его.

Во страдании вашем добре подвизавшись, и по смерти нас освещаете чудес изменением всехвальнии, верою прибегающе в Божественную церковь и торжествующе молим вас, преподобные мученицы Антонина и Надеждо: да избавимся недуг душевных и чудес благодать почерпем.

Слава, глас 6:

Новомученицы Егорьевстии достославнии, за жизнь нашу умерщвляеми, в скорбех радующеся, блаженный конец приясте. Тем от нас хвалы приимите и молитесь спастися всем нам.

И ныне, глас тойже:

Богородичен: Творец и избавитель мой Пречистая, Христос Господь, из Твоих ложесн прошед в мя оболкийся, первыя клятвы Адама свободи. Темже Ти Всечистая, яко Божии Матери же и Деве воистинну, вопием немолчно: радуйся ангельски, радуйся Владычице, предстательство и покрове, и спасение душ наших.

На благословении хлебов тропарь новомучеников, глас

5, дважды

и Богородице Дево: единожды.

Веселися о Господе, граде святого Георгия, пяточисленным осияемь светом всечестных и многострадальных заступников твоих. Ихже страдания почитающе, страстей свободяемся, к нимже прибегающе тако вопием: соблюдайте в мире чтущий вас град, и нас от всякаго зла сохраните молящеся присно

о душах наших.

На утрени

На Бог Господь: тропарь, новомучеников дважды. Слава, и ныне,
Богородичен:

Радуйся, двери Господня непроходимая: радуйся стено,
и покрове притекающих к Тебе: радуйся, необуреваемое
пристанище, и неискусобрачная, рождшая плотию Творца
Твоего и Бога: молящи не оскудевай о воспевающих,
и кланяющихся рождеству Твоему.

По 1 стихословии седален, глас 1.

Возсия днесь память ваша, новомученицы всехвальнии, верных
мысли веселящая, страсти отгонящая, тьмы неверия
изъемлющая, юже совершающих покрыйте от бед и искушений
житейских.

Слава, и ныне, Богородичен:

Пречистей руце Твои Дево Мати, простерши, покрый
уповающыя на Тя, и Сыну Твоему зовущия: всем подаждь
Христе, милости Твоя.

По 2 стихословии седален, глас 4.

Капли кровей и слез ваших, многострадальнии новомученицы
егорьевстии, иже землю нашу оросиша, аки лозу Церковь
Христову питают. Мы же бесплодное рождие да не явимся,
всеславнии, но покаянием принесем плоды благовонныя
добродетелей.

Слава, и ныне, Богородичен:

**Безневестная Чистая Дево Богородице,
едина верных предстательнице и покрове,
бед и скорбей, лютых обстояний
вся избави, на Тя надежду, Отроковице,
имущия, и души наша спаси мольбами
Твоими.**

Величание:

Величаем вас, Святии новомученицы егорьевстии, и чтим
честная страдания ваша, яже за Христа претерпели есте.

Псалом избранный:

Бог нам прибежище и сила,

Помощник в скорбех, обретших ны зело.

Сего ради не убоимся, внемда смущается земля.

Боже, кто уподобится Тебе; да не премолчиши, ниже укротиши,
Боже.

яко се врази Твои возшумеша, и ненавидящии Тя воздвигоша
главу.

На люди твоя лукавоваша волею и совещаща на Святыя Твоя.

Положиша трупия рабов Твоих брашно птицам небесным,

Плоти преподобных Твоих зверем земным.

Разжегл еси ны, якоже разжизается сребро.

яко Тебе ради умерщвляеми есмы весь день.

Вменихомся, яко овцы заклєния.

По полиелеи седален, глас 4:

Претерпевшим до конца спасение обещаый Господь, узрев ваше чистое житие и славныя подвиги, содела вас украшение благославное града святаго Георгия, и наследницы Царствия Своего. Темже молитє Христа Бога спастися почитающим любовью святую память вашу.

Слава, и ныне, Богородичен:

Стена непобедимая нам христианом еси Богородице Дево, к Тебе бо прибегающе невредими пребываем, и паки согрешающе, имамы Тя молитвенницу. Тем благодаряще вопиєм Ти: радуйся Благодатная, Господь с Тобою.

Степенна 1-й антифон 4-го гласа.

Прокимен, глас 4: Проидохом сквозе огонь и воду, и извел еси нас в покой.

Стих: Пролияша кровь их, яко воду.

Евангелиє от Матфея, зачало 36.

По 50 псалме стихира, глас 6:

Град святаго Георгия ликует о памяти вашей, доблественнии новомученицы, и вси верно сошедшеся совершаєм ваше светоносное торжество, вы бо вражие насилие попрасте и тьму неверия разрушите, мы же тако вам вопиєм: не престайте

молити о рабех своих.

Канона два: первый Богородице со ирмосом на 6 «Воду
прошед, яко сушу»:

Таже канон новомучеников на 8, глас 8.

Песнь 1, ирмос:

Колесницегонителя фараона погрузи чудотворяй иногда,
моисейский жезл крестообразно поразив, и разделив море:
Израиля же беглеца пешеходца спасе, песнь Богови
воспевающа.

Припев: Святии новомученицы егорьевския, молити Бога о нас.

Жителие бысте града святого Георгия, егоже мучению
и подвигу подражасте, ныне Победоносца великаго
в раи сожителие славнии явистесья, молитесья о нас немощных,
песнь вам воспети дерзающих.

Прииди и стани с нами великомучениче и победоносче Георгие,
града и пределов наших покровителю чудный, и осенив
вся ны твоим предстательством, огради от всякаго
зла, почитающих новомучеников егорьевских память святую.

Из глубин адовых изшедший змий неверия и богоборства
достояние Господне начат поглощати, вы же, свидетелие
крепции славы Божия, твердыми адамантами веры явистесья,
о нихже сокрушишася зубы поглотившаго их.

Страданий терпением, зело скоро обителей небесных достигоша, святии мученицы егорьевстии, терпением же лютых скорбей, яко копием главу гордаго врага поразисте, темже, молим, и нам царствия Христова достигнути помозите, козней демонских избегше.

Богородичен: Крепким Твоим покровом, Чистая, от всех навет вражиих невредимы сохрани рабы Твоя: Тя бо Едину стяжахом помощницу и прибежище в бедах.

Песнь 3, ирмос:

Ты еси утверждение притекающих к Тебе Господи, Ты еси свет омраченных, и поет Тя дух мой.

Устрелением от безбожных смерть приявши, и дух свой Христу предавши, стрел огненных всегубителя избегнути нам молите.

Жертву хваления, священномученицы, в храме Божиим приносили есте, напоследок же сами жертвою живою ставше, и души ваша чистии соделавше храми, в них же Бога прияли есте.

Избавления от лютых и безчисленных зол, страдальцы егорьевстии, почитающим болезни ваша, подайте.

Владыце подобящися мученицы святии яко агнцы на жертву ведошася, да кротостию своею милосердие Божие на землю нашу приклонят.

Богородичен: Спасе мир Богородице, от утробы Твоея воплотившееся слово Божественное, Егоже почитающе, благочестно поем Тя.

Седален, глас 4:

Светильницы явистеся в земли егорьевстей, мглу безбожия отгоняюще, Христу, непорочному Агнцу подобящися и Сего житием своим проповедающе, сами, яко агнцы заклани бысте, в терпении укрепляеми Духом Святым.

Слава, и ныне:

Ты еси стена тверда, Ты еси покров державен и крепкое в скорбех прибежище, Дево Всенепорочная, пресущнаго Бога рождшая, со святыми новомучениками непрестанно моли, оставление прегрешений и исправление жития подати, верою и любовью чтущим Тя.

Песнь 4. ирмос:

Ты моя крепость Господи, Ты моя и сила,
Ты мой Бог, Ты мое радование, не оставль недра Отча, и нашу нищету посетив, тем с пророком Аввакумом зову Ти: силе Твоей слава Человеколюбче.

Крепостию Христовою вооружився, и мучений стезею прошед, священномучениче Николае, со святых чинми достойно сликовствуеши ныне, победный венец приим.

Предстоял еси пред судищем мучителей злочестивых, и ложь никакоже из уст твоих изыде, иерее честный Николае, правды Христовы мерило вернейшее.

Верою украшен, яко солнце лучами, тьму неверия прогоняеши,
священнопроповедниче Николае, ради Христа, Сына Божия,
во плоти пришедшаго, плоть твою не пощадел еси, дух же свой
в руке Его предавый, темже не остави нас, верно блажащих тя.

Христу подобяся, от Иуды окаяннаго преданному, предателей
коварства и ты терпиши, славне, незлобием же Владыки
украшен, зовещи Ему: силе Твоей слава Человеколюбче.

Богородичен: Связанных нас пленицами многих прегрешений,
разреши Твоими молитвами, Пренепорочная, тучи слез подавая
зовущим Решителю грехов: силе Твоей слава, Человеколюбче.

Песнь 5. ирмос:

Вскую мя отринул еси от лица Твоего Свете Незаходимый,
и покрыла мя есть чуждая тма окаяннаго; но обрати
меня, и к свету заповедей Твоих пути моя направи, молюся.

Священными подвиги низлагающе беззаконных дерзость,
Андрее чудне, и в мучениих был еси в начале пресвитеров [1]
люда Божия, пастырем и пасомым благочестия образ являя.

Белаго собора настоятелю славный, душу твою кровью омыв,
белообразною украсися красотою, темже и наше окаянство
отъемше, души наша убели, яко снег.

Благочиния правило, терпения образ показуя Господь
священномученика Андрея, на свещнице церковнем сего
постави и в горниле мучений сожег, паления страстей
нас избавляет.

Сохрани молитвами твоими, отче Андрее, от искушений

и бед чтущия тя; град твой не остави, к тебе бо прибегаем, стадо твое, пастырю верному и милостивому ходатаю о душах наших.

Богородичен: Честнейшую Херувим, превысшую Небес, новомучеников славное ограждение, всей твари Заступницу, едину Богородицу песнями почтим.

Песнь 6. ирмос:

Очисти мя Спасе, многа бо беззакония моя, и из глубины зол возведи, молюся: к Тебе бо возопих, и услыши мя, Боже спасения моего.

Твоими болезнями, славне священномучениче Христов Николае, даруй очищение душевным сквернам нашим, и избавление грехов изливанием кровей твоих чтущим тя подай.

Приложися тебе враг началозлобный и слуги своя подвигну низложити святыя веры твоя крепость, но не возможе: во всеоружие бо Христово, славне, одеял еси себе.

Идеже праведных дуси, идеже Церковь перворожденных, идеже священномучеников собори, с веселием вселился еси, многотерпеливе Николае.

Богородичен: Невместимое Слово, во Твоем чреве удобно рождши, Боговместимая Скиние, утесняющего нас приложеньми лютыми, скоро избави, Дево, молитвами Твоими.

Кондак, глас 7:

В пределах егорьевстех просиявшии, яко звезды новоявленнии, священномученицы честнии: Андрее, пресвитеров правило, с ним и два страдальца славных, Чудотворцу Мирликийскому соименитых, со ангелоподобными Антониною и Надеждою, вашу память верно празднующих посетите и прелести мрак отгнав, грехов оставление испросите, чтущим любовь честная страдания ваша.

Икос:

Священства одеждею украшени, и девства светлый хитон мученическими кровьюми обогрившии, чистою жертвою и совершенною ставшии, принесостесе ныне в горний жертвенник. Темже, якоже молнии тьму неверия облиставшия, яко Духа храмы, яко Церкви твердыя столпи вас вемы, мученицы, и чтем любовь честная страдания ваша.

Песнь 7. ирмос:

От иудеи дошедше отроцы, в Вавилоне иногда, верою троическою пламень пещный попраша, поюще: Отцев Боже благословен еси.

Красота постников и страдальцев слава явистася святая двоица: Антонина и Надежда, в воздержании и терпении искуствовавшие, ловлений лукаваго избегоста, победы же славныя венцы восприимше, верных мысли удивиста.

Пресвятая Троицы служителие святии, во обитель Ея прибегоста и Трисолнечным светом озарившиесе преподобномученицы Антонина и Надежда светолепными лучами нас озаряют.

В некрепких телесех, в сосудех яко немощнейших женскаго естества, крепость ангельскую восприясте, святии преподобномученицы Антонино и Надеждо, силою Прославльшаго вас, немощи наша укрепите.

Сеятель Благий, землю плодоносну душ ваших узрев, семя жизни издетска вложи, и принесшим вам плод сторичный, мучений серпом жатву собирает.

Богородичен: Горе на небесех Херувимы носимый, доле раждаемь руку Твоею носится, Пресвятая, Чистая, яко совершен человек, погибающий мир обновляя.

Песнь 8. ирмос:

Седмерицею пещь халдейский мучитель Богочестивым неистовно разжже силою же лучшею спасены сия виде, Творцу и Избавителю вопияше: отроцы благословите, священницы воспойте, людие превозносите во вся веки.

Антонино блаженная, осьми лет сущею, во обитель пришла еси, вере Христовой всею душею отдавшия, и сию твердо соблюдши, моли нашей вере укреплятися и ересей нашествию отринуту быти.

Путем тесным шедый, Христу уневестивыйся, мучением украшается преподобномучениц полк блаженный, в немже Антонина и Надежда просиявше, сугубым подвигом и борением сугубыя венцы себе исплетоста.

Яко изгнан бысть подвигоположник Господь, то и слуги его изгнани быша, темже мучиму Жениху, и невесты мучение прияша, но обаче вшедше в радость Господа своего, чтущим их оставление грехов ходатайствуют.

Древле Еве праматери равнобожие льстивне предлагавый
от жен святых ныне попирается, отвергше бо того злокозненный
совет, пощением и муками истинное обожение получают.

Богородичен: Словом единым вся соделавый, паче слова
воплощается из Тебе, Дево Чистая, новомученики венчавый,
победно врага поправшыя.

Песнь 9. ирмос:

Воистину Богородицу Тя исповедуем спасеннии Тобою Дево
Чистая, с безплотными лики Тя величающе.

Святии новомученицы егорьевския, к краеугольному камению
Христу Богу прибегшии и волны свирепых мук отразившии,
с безплотных ликами вас величаем.

Священномученицы блаженнии, Андрее и Николаев двоице
славная, вязати и решити имущии власть, грехов наших
разрешите узы.

Светом трисолнечным озарени, страстоносицы Антонино
и Надеждо, возжелевшии ангельское житие и тех чином
совокупльшиися, Подвигоположника и Владыку всех
о нас молите.

Ведомии и неведомии мученицы, новии доблии страдальцы
от Христа венчавшиися, сродницы наши, молитесь
просвещение даровати верою хвалящим вы.

Богородичен: Отчаявшихся надежда и предстательнице верных,

настави ко спасению многими грехи отягченных и гневу и скорбем подвергшихся.

Светилен, глас 1:

Пятозарная страдалец свеща богатным озаряема светом, благодатию своею всех просвещает. Сих почитающе, Христа светоподателя молим зарею Божества нас осияти.

Богородичен: Державным Твоим покровом Чистая, нас рабов Твоих от навета вражия сохраняй всегда невредимы: Тя бо едину стяжахом прибежище в бедах.

На хвалитех стихиры новомучеников на 4, глас 1:

Мученицы святии, священства светом облистаеми, и в страданиях просиясте невечернею светлостию. К свету же незаходимому преставльшиися, молитесь о нас дароподателя Господа со священномучеников собором, емуже сочетавшеся, чтущих вас поминайте.

Мученицы святии, вас, пастырей Божественных, и началопастыря Христа подражателей, молим: нас, сущих вашего стада овец, спасайте присно от лукавых волков всемошными молитвами вашими.

Мученицы святые, девы чистые, Христу пострадавшему и страсти наша умертвившему, уневестившеся, и Его Божественным стопам последовавше, многие раны приясте, и горечь страстей отринувше, сладости небесныя вкусили есте, темже молим вас: и наша усладите сердца.

Слава, глас 8: Землю, безбожием изсохшую и Богопротивлением неплодну явившуюся, кровью своими напоили есте, молитвою же и пощением сию у плодоносивше, и семя слова Божия в ню ввергше, в землю кротких преселилися есте. Ныне же души наши плодоносны Богу явити, помозите нам предстательством своим.

И ныне, глас тойже: Владычице, приими молитву раб Твоих, и избави нас от всякия нужды и печали.

Славословие великое. И отпуст.

На литургии, блаженны от канона песнь 3-я, и 6-я, на 8.

Прокимен, глас 4: Святым, иже суть на земли его, удиви Господь вся хотения своя в них. Стих: Предзрех Господа предо мною выну, яко одесную мене есть, да не подвижуся. Апостол к Римляном, зач. 99, или ко Евреем, зач. 330. Аллилуиа, глас 4: Возваша праведнии и Господь услыша их, и от всех скорбей их избави их. Стих: Многи скорби праведным и от всех их избавит я Господь. Евангелие от Луки, зач. 106. Причастен: Радуйтесь праведнии о Господе, правым подобает похвала.

МОЛИТВА СВЯТЫМ НОВОМУЧЕНИКАМ И ИСПОВЕДНИКАМ ЕГОРЬЕВСКИМ.

Святии Славнии и всехвальнии новомученицы и исповедницы земли Егорьевской! Собрании в храме сем и пред иконою вашею святою поклоняющиеся люди молят вас, известныя желания нашего хадатаи: молитесь с нами и о нас умоляемого от своего благосердия Бога, да милостивно услышит нас просящих Его благостыню, и не оставит вся наша ко спасению и житию нуждная прошения. Да укрепит всякое начало и власть имже судил еси правити на земли. Воинство православное да сохранит, оружием истины и благоволения

венчает их и силы возстающих враг наших да низложит.
О храбрые воины небеснаго Царя победившие земные прелести
всем в скорби и обстоянии сущим многомоощное явите
заступление ваше.

Вы Богом избрании бывше, кровьми очистишася и венцем
страдальческим от Христа украшени бысте о немже дивную
кончину прияли есте. темже убо смиренно молимся вам: молити
милостиваго Владыку, да подаст нам дух ваша ревности
ко хранению святых его заповедей, яко да текше по стопам
вашим, возможем земное поприще в добродетельном житии
без порока прейти, и в покаянии достигнути преславных
селений райских и тамо купно с вами прославляти Отца и Сына
и Святаго Духа, во веки веков. Аминь.

[1] Это намек на то, что сщмч. Андрей был благочинным и имел
сан протоиерея, как в молитве на протоиерейство говорится: «В
начале стояти пресвитеров люда Твоего»